

Na Neptali Henriquez Park a desvela un Muraya di Fama

ORANJESTAD- Diabierna atardi, durante un ceremonia simpel y chikito, directiva di Fundacion Neptali E. Henriquez Sr. a desvela su Muraya di Fama na honor y den feliz memoria di señora Wekker (Sra. Florence Wekker y Tante Gerda. (Gerda de Groot). Como presidente di e fundacion, Sr. Bibi Arends a expresa su satisfaccion cu despues cu su directiva pa pasa den algun aña di hopi trabao cu varios contra tempo, porfin Neptali Park ta completamente recupera, renoba y full operacional. Bibi Arends ta splica: 'Pa e mes un motibo aki a yega tempo tambe pa reconoce e hendenan cu tanto dedicacion, pasion y voluntariamente, a traha, crea y a engrandece e park aki cu tin e unico meta pa yuda den e desaroyo positivo di nos comunidad di mucha chikito'. E honor pa efectua e desvela a bay na yiu muhe di Tante Gerda, Srta. Nadine Salas, cu ta biba na Hulanda pero despues di tabata na Aruba pa entiero di su mama, a bolbe

Aruba pa un corto tempo pa caba di regla cosnan di su mama. Bibi Arends ta sigui splica: 'Un aña pasa, ariba un dialuna, 21 di januari, nos directiva a bay den shock cu e noticia cu den oranan di marduga Tante Gerda (nos Secretaria) a fayece na su cas caminda e tabata biba su so. Esaki despues di a sufrir di un enfermedad corto cu niun hende por a sospecha algo di dje. Tante Gerda tabata un di e boluntarionan cu desde cu señora Wekker a yega Aruba y a cuminsa dedica su mes na nos muchanan, a apoya señora Wekker y para banda di dje te ariba e dia cu señora Wekker a fayece. Ta relevante pa menciona cu Tante Gerda a haci esaki sin cu e tabata tin e responsabilidad di un miembro di directiva, pasobra e no tabata miembro di señora Wekker su directiva. Srta. Nadine, obviamente emocionada, a papia di su mama su apoyo na señora Wekker su comision Van het Kind voor het Kind, y despues di e creacion di Neptali Park, caminda Tante Gerda a haci uzo di

su carera den media di radio y television pa yuda señora Wekker popularisa binimento y e fiesta di Sinterklaas na Aruba. Despues e park a bira e prome luga cu Sinterklaas tabata bishita ora e yega waf. Ademas Srta. Nadine a sorprende e invitado ora cu e la menciona un serie di otro organizacion y comisionnan cu su Mama tabata forma parti di nan. Sra. Vda. Femy Muyale, di e Rummy Club den cual Tante Gerda tabata participa tur siman, tambe tabata tin palabranan di elogio di e persona asina simpatico y cariñoso cu nan a siña conoce den Tante Gerda. Finalmente Bibi Arends y despues Sr. Pancho Geerman kende cu pa hopi aña a conseha, apoya y yuda Mevrouw Wekker den su trabaonan, siendo cu Pancho tampoco nunca a forma parti den e directiva di e fundacion, a duna un relato cronologico basta extenso di

e careda di Mevrouw Wekker. Su nomber tabata Sra. Florence Angelique Melba Eleonor Wekker. E la nace na 1915 na Surinam y a yega Aruba na 1947 caminda e la traha na DOW, Bevolkingsbureau y Veterinaire Dienst. Semper e tabata yuda, caminda cu e por, tanto mucha como hende grandi, cu bril, aparato pa scucha, sapato, cos di hunga y cuminda. Un di su prome programa pa mucha tabata na Radio Antiana. E la dirigi e comision "Van het Kind voor het Kind". E tabata tin varios programa di Sinterklaas na Tele Aruba cu premio pa concurso di pinta. Na 1971 e la organisa e prome yegada di Sinterklaas na Wilhelmina Stadion (Guillermo Prospero Trinidad). Despues e evento a move pa Hotel Central y a sigui hala atencion di chikito y grandi. Mevrouw Wekker a lanta e Fundacion Neptali E. Hen-

riquez Sr. na 1974 cu meta pa yuda den e desaroyo positivo di mucha. Cu cooperacion di Betico Croes, Gobernador Leito di Antias Hulandes y di Hulanda, e la crea e park di cual su apertura oficial a wordo efectua pa Su Altesa Real Princesa Margriet di Hulanda. Na 1986, despues cu Sinterklaas a wordo bon bini na waf pa nos mandatarionan y Mevrouw Wekker, pa prome biaha, Sinterklaas a dirigi su mes, acompaña pa un drumband, pa e park, caminda a sigui un fiesta di bon bini cu regalo y cos dushi pa tur mucha. Señora Wekker a fayece dia 18 maart 2002, pero su trabaonan pa mucha no tabata envano y ta sigui. Finalmente Bibi Arends ta duna danki tambe na Checkpoint Color pa e bunita potretnan cu awor ta e comienso di e Muraya di Fama cu a lo largo lo bira un muraya di e historia di e parke'. □